



Narsami illumik nutaaliorfimmik 300 m²-isut angissusilimmik pilersaarusiortoqarlunilu sanasoqarnissaanut Naalakkersuisut FLL17-imi aningaasaliinissamut peqquneqarnissaannut Inatsisartut aalajangiiffigisassaattut siunnersuut. Illumi nutaaliorfiusumi nutaaliortiternissap siuarsarneqarnera inuussutissarsiutitigullu siuarsaaneq sulissutigineqassapput, taakkunani ilaallutik takornariaqarnermi ingerlassat kiisalu sumiiffinni pissarititat aallaavigalugit tunisassiassanik inerisaaneq, tassa kujataani pisuussutit uumassusillit umaatsullu pigineqartut aallaavigalugit tunisassiornikkut imminut pilersorneq siuarsarneqarsinnaaqqullugu. Nutaaliorfiup ingerlanneqarnera Namminersorlutik Oqartussanit isumagineqassaaq.

(Inatsisartunut ilaasortaq Aqqaluaq B. Egede, Inuit Ataqatigiit)

Siullermik Inuit Ataqatigiinniik inatsisartuni ilaasortaaqatitta Aqqaluaq Biilmann Egede qutsavigissavarput, nunatut namminiilivittussatut piareersaataasumik politikikkullu pingaartilluinnarneqartariaqartumik siunnersuuteqarneranut.

Imminut pilersorneq pingaarluinnartutut isigisariaqarpoq, siunnersuut taassaavoq nunap iluani inuussutissarsiutit aningaasarsiornermillu annertuumik pilersitsiviusussatut qularinagu isigineqartariaqartoq. Nunatsinni suliffissameernerup nalaani suliffissat minguitsut, qaqugumut piusussat inerisarlugit nutarteriniarta. inuussutissarsiutit nutaat pilersinniarnaqartut tamaasa, pingaartumik imminut pilersorneq siuarsassallugu soqutiginerusariaqarparput. Tassami nunatta avataanut aningaasat annissukkavut inuussutissanik nerisassianillu pilersorneqarnitsinnik annertuumik tunngaveqarpoq.

Allanngortoqartariaqarpoq. Nammitsinnik ingerlatassatsinnik inerisaanissaq aallartittariaqarparput. Nunatta inuisa piginnaaneri atorlugit kukkukuuteqarneq, puulukiiteqarneq, minninnik avatitsinniit piniartuaannarsinnaanngilagut. Immineq pilersitsiortortariaqarpugut. Nammineq ingerlatsilluta tunisassiorumalluta inerisaaniarta. Naalakkersuinikkut isumaqatigiilluta nunatta inuisalu aningaasarsiornerat atugartuussutsikkullu alloriaqqinnissaat aallartinniartigu.

Siunnersuut una aallartiffissatsialaavoq nunap immikkoortuani imminut pilersornermik ilisimasanik ineriartortitsiffioreersumi, inuillu ilisimasaasa nungujartuinnartinnagit atorluarneqarnissaat tunngaviussammata. Siunnersuummut akerliuneq, siunnersuummik allamik nutaamik taartissaqartinneqanngippat, taava ullumikkutut uninngarusarneq nangittumik ingerlaannartussaavoq.

Nunatsinni inuussutit uumassusillinnik (**Piniakkatsinnik taasartakkatsinnik**) ulluinarni nerisartakkavut sinerissami siamaseqisumi uumasunik assigiinngisitaartunik mamarilluakkatsinnillu peqarnerput nutaaliornikkut atorluartariaqalerippat inerisartariaqalerippullu Inuit Ataqatigiinniik isumaqaratta.

Mamarilluakkatsinnimmi soorlu avannaaniik tunumiillu mattannik panertulerlugit imaluunniit arlaannik nutaanik akoorilluta ineriartortitsisimavugut, savanik uumasuniillu nunamiunik ullumikkut nutaaliarineqarsimasuniit suli amerlanernik immaqa allaat nunatta avataani niuerutigineqarsinnaasunik nutaaliornikkut nassaartortoqarsinnaavoq. Tamakkununga ilaapput aalisakkat avannaani tupissutit, eqaluaasat allallu kujataani eqaluit kapisillit

ammassaat allarpassuillu nutaaliornikkut ineriartortillugit nunatsinni avataanilu pilersuutigisinnaasagut.

Neriulluarnartoqaraluartorli ajuusaarnarpoq piffissami kingullermit naalackersuisuniik naalackersuisooqataasuniillu akissutaasartut imatut ersaritsigilermata, allaat illoqarfiit mikinerusunik taaneqarlutik nunaqarfinnillu inuerukkiartulersunik taaneqarlutik apeqqusersorneqartuarmata, naak siunnersuutit qaqinneqartartut tassaasut siamasissumik najugaqariuseqarnitta nukittuumik ingerlaqataanissaanut aammalu inuussutissanik pilersuinissamut periarfissiiniaraluartut.

Soorlumi qanittumi imm. 118 Kalistat Lund-imik qaqinneqartoq pillugu Naalackersuisooqataasuniik Alluitsup Paa 300 missaannaanik inoqalermat, aammalu nunaqarfimmi pineqartumi inuit utoqqalereermata, nunaqarfillu ataasiinnaq pineqarmat aningaasartuuteqarfiginissaat piviusorsioortuunngitsoq.

Uranisiortitsinissaarsuartut takorluukkap taqqavani pilersinneqartussap, kujataani pilersikkumasat allat pilersissinnaajunnaarsissavai? Ilumut taama initutigilernerata inuiaat ataatsimooruteqartuarsimasut taama ataqqinangitsigisumik avissaartuutilernerpai, tamanna akuersaarneqarsinnaanngilluinnarpoq **siamasissuseq, ataatsimoortumik tunngaviusumillu pingaartitaqarneq, qanilaartuuneq, nuannaartuuneq, inuussutinillu mamarisanik nerisaqatigiinneq** taamaaliinnarlugit nunami maani qimanneqartariaqanngillat!

Ila inuiannik Kalaallinik eqiterutsitsiniarneq allaat inuiaat ilaannik immikkoortitsilluinnarluni avissaartuutissanillusoq naalackersuisooqatigiit suliaqarnerat akuersaarneqanngilluinnaqqissaartoq, piaartumilli ullumikkorpiaq suliassavinnut saatitsisoqartariaqartoq Inuit Ataqatigiinniik kissaatingaarput.

Isumaqarlutalu tamanna naalackersuinikkut suliassanik ajornannginaariniarneruvallaaqaq alanngoqqusillunilu eqiteriniarnertut isigineqartariaqarluni. Naak Inuit Ataqatigiit upperilluinnaripput, nunatsinni najugaqariuserput ullumikkutut isikkoqaraluarluni siunissamut attalluarneqarsinnaasumik ineriartortoqarsinnaasoq.

Matuma siunnersuutip sumiiffinni Narsatut ittuni ineriartorfiusinnaasunik periarfissaqalernissaa qularnaannerulersissavaa, sumiiffinnimi pilersinneqartussat sivisuumik attanneqarsinnaasumillu inuussutissarsiutigineqarsinnaasut najungalinnillu ilisimaneqartut qulaajarlugillu qajannaallisarsinnaammagit.

Ullumikkut Kommunit innuttaasunik qanimut sullissisut suliassaasa qitiusumut eqiterneqarfiat Inuit Ataqatigiinniik akuersaarsinnaanngilarput. Sisimiuni Maniitsumilu matumunga assingusut matusimappata aporfiit qaangerneqarsinnaanngitsut Naalackersuisut isiginninnerat ajuusaarnarpallaaqaq. Ullumikkummi Kommunit suliffissanik nutaanik ilungersorlutik noqqaapput, suliffissanullu aallarnisaanermut ineriartuutaasinnaasunik ujartuileruttorlutik. Aammattaaq Namminersorlutik Oqartussanik suleqateqarluni ingerlarsornissaq pisariaqartinneqarluni, taakkuummata innuttaasut atugarissaarnissaanut akissaqarlualernissamut neriuutigineqartut.

Kommunit siunnersuummut matumasut ittunik, inuiaqatigiinnut siursaataasinnaasunik ineriartormullu aallarniutaasinnaasunik aningaasaliissutaasartussanik periarfissinneqartalernissaat timitalerneqartariaqalerpoq, tamanna kommunit eqiterunneqarnerannut politikimi atatillugu siunertanut aamma ilaareermat.

Matumanissaaq inuiaqatigiittut nukittuumik ingerlanissatsinnut nukittorsaataasinnaasunik, soorlu aningaasanik tapiissuteqartarnernik politikikkiknullu suleqatigiinnernik suli ullumikkornit annertunerungaartumik pisortaniik pilersuisinnaasariaqarpugut. Oqinnersiorneruallaassaaq tapiissutit inuiaqatigiinnik aningaasarsiornikkut kivitseqataasinnaasunik pilersitsisinnaasut, politikikkut aningaasarliornerput tunngavilersuutigalugu naalackersuisooqatigiinniik unititsiniaasoqarmat.

Imaluunniit naalakkersuisooqatigiit ilalaarfigiinnarpaat politikikkut suleqatit, inuiaallu oqariartuutaat tusaanagit nunami maani aqutserusussuseq? Allaat siunnersuummut matumasut ittunik ineriartuutaasinnaasunik kiisalu tamat oqartussaaqataanerata nukittorsaatigisinnaasaanik matooreqataallutik?

Siunnersuut tamakkiisumik tapersensoratsigu Inuit Ataqtigiitniit innersuussutigissavarput una siunnersuut inuussutissarsiornermut ataatsimiititaliamut ingerlateqqinneqassasoq, tassanilu kissaatigaarput nunatsinni nutaaliornerup ingerlaavartumik ingerlanneqarsinnaanera eqqartorneqarluassasoq.